



OSualdus ex illustri familia comitum à Thierstein natus, & in omnibus uirtutibus educatus fuit. Is cum prima literarum fundamenta foelicitè iecisset, postea animum ad armorum studia adiecit, & regum atq; principum castra sequendo sibi magnam auctoritatem comparauit, idq; præsertim eo tempore, cum Carolus Burgundus ab Austriacis et confœderatis uinceretur. Deinde quoq; Anno 1475 præfectus Sundgouix & Brisgaurix à Cæsare constitutus fuit. Eam prouinciam cum Osualdus suscepisset, atq; multa negocia passim exorirentur, ipse primus præfectorum suos cõsiliarios in Ensisheim residere iussit, & ibi certa domicilia

ipsis constituit, cum prius tantùm alibi habitantes tempore iudicij eò uocarentur. Hoc modo factum ut subditi in officio retinerentur, atq; iudices Osualdi uirtutes imitarentur. Itaq; contigit, ut Osualdus Maximiliano Cæsari ob uirtutes esset gratissimus. Cum hoc modo in superiori Alsatia magna prudentia uersaretur, tandem ueneranda canitie conspicuus obiit, & à suis honorificè sepultus fuit. Monsterus libro tertio Cosmograph.